



10. september 2021

UKA 2021/151

Inatsisartut Suleriaasianni § 36 naapertorlugu apeqquteqaat aallaavigalugu oqallinnissamik siunnersuut imaattoq matumuuna saqqummiuppara:

Apeqquteqaat aallaavigalugu siunnersuut, qanoq ililluta kalaallit sakkutuunngorsinnaanerannut periarfissat qulakkeersinnaanerivut, aammalu taamatut Illersornissap iluani ingerlariaqqiffiusinnaasunik ilinniakkanut isersinnaaneq qulakkeersinnaaneripput.

(Inatsisartunut ilaasortaq Anna Wangenheim, Demokraatit)

Ilinniakkat suulluunniit pisuujunerulersittarpaatigut. Nunatut inuiattullu. Taamaattumik upperiuminaalluinnarpoq, Naalakkersuisut inuit nunatsinni, Illersornissaqarfimmi ilinniagaqarniarlutik kissaateqartut taparserumangimmatigit.

Sakkutuunngorniarnissamat misilitsinnerit Naalakkersuisut unitsilluinnassallugit aaliangiussimavaat, taamatullu Illersornissaqarfimmi ilinniagaqalernissamat periarfissat. Ilumut ilumoorinnaanerpa, tamanna Inatsisartuni amerlanerussuteqartunit taparserneqartoq? Tamanna oqallinnermi matumani paasinariusuppara.

Ingerlaannarlu oqaatigilara; Demokraatit apeqqummut tassunga Naalakkersuisut isumaat isumaqatiginngilluinnarmassuk.

Partiit amerlanersaasa siunissami Kalaallit Nunaata namminiilernissaa kissaatigaat. Naalakkersuisut maanna issiasut ilaatigut ilaqarput namminiilivinnissamat illersuinerpaasunik taamaammallu eqqumiigerujussuarpara, illersornissamat tunngasunik ilinniagaqarnerit annertusarnissaat kissaatigineqangimmat. Isumaqarluinnarpunga, namminiilivinnermik kissaateqarnerup naleqqatigilluinnaraa, kalaallisut ilinniagaqarnerup annertusarnissaa, Kalaallit Nunaat illersornissakut-aamma sillimaniarnikkut siunissami nammineq ingerlatsisinnaanngorlugu. Isumaqarpunga ilinniarnarit aqutissaasut, aammalu ilinniarnarit tamarmik Kalaallit Nunaat kalaallillu pisuujunerulersittaraat. Isumaliortaatsimut naleqqutinngilluinnarpoq kalaallit ilinniakkanut taakkununga ilinniarnissaasa naallerarnissaat. Namminiilivikkutta Illersornissamat ilinniagalinnik nunatsinni peqartariaqanginnatta?

Eqqumiiginarluinnarpoq, Naalakkersuisut inuusuttut ilinniagaqarnissaannik akornusersoraat, kisiannili tassa, taamaaliorput. Naleqquttuunerpa, inuusuttut ilinniarnissamat periarfissaannik arsaartornissaat? Politikkeriusugut ilinniagaqarnissamat kaammattuissanginnatta?

Demokraatit taama iliorneq paasisinnaanngilluinnarpaat, pingaartuuvorlu, oqallinnermi matumani tunaartassanik malittarisassanillu najoqutassiuinissarput, Naalakkersuisut Illersornissamat ilinniakkanut kalaallit inuusuttut kissaateqarnerisa akerrilernerata eqqarsaatigeqqinnissaanut. Suunuku ajoqutaasut, innuttaasut amerlanerit ilinniagaqalernissaannut?

Demokraatit isumaqarput, Illersornissamat ilinniagaqarneq Illersornissap iluani assigiinngitsorpassuartigut suliaqarnermut atorneqarsinnaasoq. Takussutissarpassuaqarpoq, Illersornissap iluani ilinniagarnerup



suliffinni allani kusanartumik angusaqarluarfigineqartarnera. Inuusuttut periarfissaannik mattussinerup suna iluaqutissartarigamiuk?

Tamanna tunngavigalugu Demokraatit neriutigaat, Inatsisartut tamarmiusut una oqallinneq aqputigalugu Naalackersuisut killissinnaassagaat qularnaarumallugu, inuusuttut aamma siunissami sakkutuunngornissamut misilitsittarnissaat taannalu aqputigalugu Illersornissap iluani ilinniagaqalernissamut periarfissinneqarlutik.

Naalackersuisut partiillu allat sammisamut uunga isumaasa tusarnissaat qilanaaraara.